



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Sumáriu Kazu

Períodu : Juñu 2012

Edisaun : 04 Jullu 2012

Sumáriu ba julgamentu iha Tribunál Distritál Suai iha semana terseiru fulan Juñu 2012

Hahú iha semana terseiru fulan Juñu 2012, JSMP halo monitorizasaun ba prosesu julgamentu iha Tribunál Distritál Suai. Sumáriu kazu ida ne'e, atu kompleta liu tan sumáriu kazu semana primeiru no segundu ne'ebé hatun tiha iha edisaun antes iha inisiu fulan Jullu 2012.

Totál kazu ne'ebé mak JSMP monitoriza durante períodu ne'e hamutuk kazu 8 (walu). Kazu hirak ne'e kompostu husi kazu krime administrasaun danoza 1, krime ofensa integridade fízika simples 2, krime infantisídiu 1, krime pekulatu 1, omísidu agravadu 1 no krime violénsia doméstika 2.

Tuir observasaun JSMP nian, katak maski agenda julgamentu iha tribunál refere la'ó lor-loron maibé iha kazu balun kontinua adiadu nafatin tanbá parte intresadu sira la marka prezensa iha tribunál ho razaun ne'ebé la klaru.

Parte interesadu hirak ne'e inklui vítima no testamuña sira ne'ebé mak notifikadu ona atu presta sira nia deklarasaun no depoimentus iha tribunál hodi bele ajuda tribunál atu deskobre faktus ba krime ne'ebé mak akontese.

Tuir mai detalladu sumáriu prosesu julgamentu kazu sira kompletu:

1. Kazu krime adminstrasaun danoza Nú.38/PEN/2012/TDS

Iha loron 19 Juñu 2012, Tribunál Distritál Suai hala'ó julgamentu ba kazu krime administrasaun danoza ne'ebé rejista ho Númeru Prosesu: 38/PEN/2012/TDS. Arguidu ba kazu ne'e involve husi ema na'in 2 (rua). Sira ida-idak ho inisiál LFS no OS hasoru Estadu Timor Leste. Kazu ne'e akontese iha tinan 2004, iha Suco Mendeilo, Sub distritu Turiskai Distritu Manufahi.

Prosesu julgamentu hala'ó ho kompozisaun juízes kolektivu ne'ebé kompostu husi Dr. Álvaro Maria Freitas nu'udar juíz prezidénate, akompaña husi Dra. Florençia Freitas no Dr. Pedro Rapoza Figuerreiro (Juíz internacional). Iha parte seluk, Ministériu Públiku reprezenta husi Dr.

António da Silva Tavares no arguidu sira hetan defeza husi Dr. Marçal Mascarenhas husi Eskritóriu Defensória Públiku.

Tuir akuzsaun Ministériu Públiku nian, katak iha tinan 2004, governu liu husi Ministériu MAEOT aloka orsamentu ho montante US\$.7.000.00 ba arguidu LFS ne'ebé ezerse funsaun nu'udar xefi suco no arguidu OS nu'udar tezoreiru. Objetivu ba orsamentu refere, atu halo konstruksaun ba Sede Suco Mindeilo, maibé to'o oras ne'e kontruksaun sede suco paradu hela, nune'é atendentu no servisu administrasaun suco hala'o deit iha rezedénsia xefi suco foun nia uma.

Relasiona ho faktus hirak ne'e, Ministériu Públiku akuza arguidu ho Lei No.31/1999 Lei Indonézia kona-ba Anti Korupsaun nomós referensia ba artigu 274 Kódigu Penál Timor Leste.

Iha prosesu julgamentu ne'e, arguidu sira hili direitu nonook tuir artigu 60 alinea (c) Kódigu Prosesu Penál.¹

Mesmu arguidu sira hili direitu nonook, maibé ne'e la signifika katak nonook ka ko'alia bele prejudika ba kazu refere. Direitu arguidu atu fó ka la fó deklarasaun la aumenta ka la hamenus faktus ruma nomós la fó vantajen ou desvantajen ba kazu ida ne'e. Tuir artigu 165 KPP sei fó fatin ba tribunál atu apresia livremente prova no rekuñesimentu nia rezultadu.

Bázeia ba JSMP nia observsaun katak Ministériu Públiku apresenta testamuña nai'in 7 (hitu). Sira ida-idak ho inisiál CM, VdC, MB, OR, VL, EQ, JdC, AH. Iha testamuña sira nia depoimentus ba tribunál katak loos duni governu MAEOT aloka orsamentu hanesan haktuir ona iha akuzsaun laran ho montante US\$.7.000.00, atu halo konstruksaun ba sede suco Mindeilo, maibé kontruksaun ne'e la remata to'o oras ne'e. Liu tan testamuña hirak ne'e argumenta katak atendentu ba públiku sei nafatin iha rezidénsia xefi suco foun nia uma.

Iha alegasaun finál Ministériu Públiku nian, husu ba tribunál atu kondena arguidu nain 2 (rua) ho pena prizaun la tun husi tinan 4 iha prizaun. Pozisaun Ministériu Públiku nian, bázeia nafatin ba akuzasaun no liga ba depoimentu husi testamuña.

Iha parte seluk defeza hato'ó ba tribunál atu absolve arguidu sira husi akuzasaun Ministériu Públiku nian, tanbá arguidu sira la iha intensaun atu subar osan. Kontruksaun ne'e halo duni maibé la remata. Aliende ne'e mós, arguidu sira la iha maneijamentu hodi jere orsamentu ne'e.

Prosesu julgamentu ho lee leitura akórdaun ba kazu ne'e, sei halo iha loraun 4 fulan Jullu 2012, iha oras tuku 14.30 loraik.

¹ Artigu 60 (c) Kódigu Prosesu Penál (KPP) ne'ebe defini kona-ba direitu arguidu nian defini katak: atu, ho liberdade, fó ka la fó deklarasaun, conforme nia hakrak, no halo ka husu atu halo, deklarasaun, iha kualkér altura durante inkéritu ka audiénsia-julgamentu.

2. Kazu krime ofensa integridade física simples Nú.99/PEN/2011/TDS

Tuir mai, iha loron 19 Juñu 2012, tuir loloos Tribunál Distritál Suai halo julgamentu ba kazu krime ofensa integridade física simples ne'ebé rejista ho Númeru Prosesu: 99/PEN/2011/TDS, maibé prosesu julgamentu la konsege realijadu.

Adiamentu ba kazu ne'e dirije husi juíz singulár Dr. Álvaro Maria Freitas, Ministériu Públiku representa husi Dr. António da Silva Tavares no parte defeza Dr. Marçal Macarenhas husi Eskritóriu Defensória Públiku.

Tuir Ministériu Públiku, katak durante loron 5 (lima) nia laran parte ne'ebé mak la marka prezensa hanesan vítima nomós testamuña la fó justifikasaun klaru ba tribunál kona-ba sira nia impedimentu, husu ba tribunál atu kondena selu kusta judisiáriu ho valór US\$.10.00.

Prosesu julgamentu ba kazu ne'e sei halo fila fali ba iha loron 24 fulan Jullu 2012, iha oras 10.00 dader.

3. Kazu krime infantisídiu Nú.59/PEN/2011/TDS

Iha loron 20 fulan Juñu 2012, Tribunál Distritál Suai halo julgamentu ho agenda lee leitura sentensa ba kazu infantisídiu ne'ebé rejista ho Númeru Prosesu: 59/PEN/2011/TDS. Kazu ne'e komete husi Domingas Moniz Noronha ne'ebé akontese iha Suco Mali Lait, Sub-distritu Bobonaro, Distritu Bobonaro, iha loron 10 Feveireiru 2011.

Antes ne'e, julgamentu halao ho juízes kolektivu, maibé julgamentu ba lee leitura sentensa dirije husi juíz singulár Dr. Costançio Barros Basmary, Ministériu Públiku representa husi Dr. António da Silva Tavares no Dr. Oscar Silva Tavares. Iha parte seluk, arguida ninia defeza mai ho equipa mak hanesan Dr. Marçal Mascarenhas no Dr. João Henrique de Carvalho husi Eskritóriu defensória Públiku.

Bázeia prosesu hirak ne'e, Juíz konklui katak arguida provadu komete krime tuir saida mak Ministériu Públiku akuza hasoru arguida. Kazu ne'e, realijadu ho maneira arguida depoisde partus buti metin bebe nia ibun, nune'é bebe hakotu nia vida. Depois arguida lori bebe nia isin loloon ba tau iha hudi hun no lori fatuk hanehan tan iha bebe nia isin leten.

Ministériu Públiku akuza arguida ho artigu 142 Kódigu Penál Timor Leste kona-ba krime infantisídiu

Relasiona ho prosesu no faktu provadus hirak ne'e, tribunál deside hodi kondena arguida ho pena tinan 3 (tolu) prizaun, maibé suspende ba tinan 3 iha liur.

Tuir JSMP nia observasaun katak tribunál aplika pena suspensaun ba kondenada ho razaun tanbá kondenada sei iha oan ki'ik ho idade foin fulan 2 (rua). Aleinde ne'e mós, iha prosesu jugamentu primeiru arguida arependimentu ba nia hahalok no promete ba tribunál katak arguida sei la repete tan hahahlok ne'e iha tempu oin mai.

4. Kazu krime pekulatu Nú.56/PEN/2012/TDS

Iha loron 20 Juñu 2012, Tribunál Distritál Suai hala'ó prosesu julgamentu ba kazu pekulatu ne'ebé rejista ho Nú.Prosesu 56/PEN/2012/TDS. Arguidu ba kazu ne'e involve husi ema na'in 4 (ha'at). Sira ida-idak ho inisiál AM, JdJ, MB no SG kontra Estadu Timor Leste. Kazu refere, akontese iha tinan 2004, iha Suco Tapo Memo, Sub-distritu Maliana, Distritu Bobonaro.

Prosesu julgamentu hala'ó ho kompozisaun juízes kolektivu ho nia kompozisaun mak Dr. Costançio Barros Basmery nu'udar prezidênte, akompaña husi Dra. Florençia Freitas no Dr. Pedro Rapoza Figueiriu (Juíz internacional). Iha parte seluk, Ministériu Públiku reprezenta husi Dr. António da Silva Tavares no arguidu sira hetan defeza husi Dr. Marçal Mascarenhas husi Eskritóriu Defensória Públiku.

Tuir akuzasaun Mnistériu Públiku nian, katak iha tinan 2004 arguidu sira ezerse funsaun nu'udar xefe suco no xefi aldeia, iha Suco Tapo Memo, Sub distritu Maliana, Distritu Bobonaro.

Iha fulan Janeiro 2007, governu liu husi Ministériu Agrikultura Floresta no Peskas, establese fundu dezvoltamentu komunitaria, atu fó apoiu ba comunidade iha suco refere hodi dezvoltave sira nia agrikultura no pekuaria ho orsamentu nia montante US\$.10.000.00 (dolar amerikanu rihun sanulu).

Husi montante osan ne'e, arguidu sira sosa tratór 4 (ha'at). Kada trator ho folin 2.500.00 (dolares amerikanu rua atus lima), tanbá ne'e total orsamentu ba trator ha'at ne'e hamutuk US\$.10.000.00 (dolares amerikanu rihun sanulu).

Iha fulan Dezembru 2009, arguidu sira utilize trator refere hanesan sira nia rasik hodi benefisia ba sira nia an rasik no sira nia familia rasik ka grupu deit, maibé trator ne'e oferese ba comunidade iha Suco Tapo Memo tomak.

Relasiona ho faktu hirak iha leten, Ministériu Públiku akuza arguidu ho artigu 415 husi Kódigu Penál Indonézia konjugadu ho artigu 8 Lei Indonézia No.31/1999 Kona-ba Anti Korupsaun ne'ebé koresponde ba artigu 295 husi Kódigu Penál Timor Leste.

Iha deklarasaun arguidu sira nian, katak akuzasaun Minstériu Públiku nian loos hotu, maibé arguidu sira mós argumentu liu tan katak tuir loloos trator 4 (ha'at) ne'e entrega fila fali ba sede suco, maibé xefi suco foun mak lakoi simu trator hirak ne'e, hodi nune'é trator sei rai nafatin iha arguidu sira nia rezidénsia.

Bázeia ba prosesu ho faktus hirak ne'e, iha alegasaun finál, Ministériu Públiku husu ba tribunál atu kondena arguidu sira ho pena tinan 3 prizaun maibé suspende ba tinan 5. Entertantu, parte defeza husu ba tribunál atu aplika pena suspensaun ne'ebé mak kman ba arguidu sira tanbá arguidu sira hatudu arependimentu ba sira nia hahalok no foin primeíra ves halo krime.

Leitura akórdaun ba kazu ne'e sei lee iha loron 03 fulan Jullu 2012, iha oras tuku 14.30 lororaik.

5. Kazu omisídiu agravadu Nú.01/PEN/2012/TDS

Tuir mai, iha loron 20 fulan Juñu 2012, Tribunál Distritál Suai hala'ó julgamentu kontinuasaun ba kazu omisídiu agravadu ne'ebé rejista ho Númeru Prosesu: 01/PEN/2012/TDS. Arguidu ba kazu ne'e involve husi ema na'in 3 (tolu). Sira ida-idak ho inisiál ALB, AMB no PSM hasoru vítima Ernesto no Eusebio da Costa. Kazu ne'e akontese iha Suco Made Bau Sub Distritu Atabae Distritu Bobonaro, iha loron 10 Juñu 2011.

Prosesu julgamentu hala'ó ho kompozisaun juízes kolektivu ne'ebé kompostu husi Dr. Costanção Barros Basmery hanesan juíz prezidénte), akompañadu husi Dr. Álvaro Maria Freitas no Dra. Florença Freitas. Iha fatin seluk, Ministériu Públiku representa husi Dr. Oscar Silva Tavares (MP internacional) no arguidu sira hetan defeza husi Dr. João Henrique de Carvalho husi Eskritóriu Defensória Públiku.

Iha prosesu julgamentu ba kazu ne'e, hodi rona testamuña sira ne'ebé parte defeza apresenta ba tribunál.

Tuir testamuña LM nia depoimentu ba tribunál katak la'os arguidu sira mak -komete krime omisídiu hasoru matebian na'in 2 (rua) ne'e, tanbá durante ne'e entre arguidu na'in 3 (tolu) ho vítima sira la iha problema. Liu tan testamuña deklara katak depoisde akontesimentu arguidu na'in 3 mós ba foti mate isin ne'e hodi mai rai uma.

Nune'é mós testamuña seluk ho inisial LP reforsa tan depoimentu LM nian, katak loos duni arguidu na'in 3 tolu la iha problema ho matebian na'in 2 (rua), tanbá sira sei iha relasaun família.

Tuir mai, testamuña DG depoimentu ba tribunál katak nia simu telefone husi ema seluk ne'ebé deklara ba testamuña katak matebian na'in 2 ema mak oho, maibé la dehan katak arguidu na'in 3 (tolu) oho matebian na'in 2 (rua), tanbá depoisde akontesementu arguidu sira mós ba ajuda foti matebian lori mai tau iha uma.

Mesmu testamuña sira nia depoimentu kuaze la hatudu faktu kona-ba involvimentu arguidu sira nian, maibe Ministeriu Públiku bázeia ba faktus ne'ebé deskobre iha audiénsia julgamentu primeíru to'o alegasaun final, Ministériu Públiku kontinua mantein nia pozisaun tuir ba artigu 139 alinea (f) Kódigu Penál kona-ba omisídius agravadu, no artigu 52.(2), letra (a), (c), (j), no (m) Kódigu Penál kona-ba sirkunstánsia agravante jerál.

Bázeia ba artigu hirak ne'e, Ministériu Públiku husu ba tribunál atu kondena arguidu sira ho pena prizaun la tun liu husi tinan 20. Aliende ne'e, kondena mós arguidu sira atu selu indemnizasan tuir lei ne'ebé definidu.

Hatan alegasaun finál husi Ministériu Públiku nian, parte defeza husu ba tribunál atu aplika pena ne'ebé kma'an ba arguidu sira tanbá arguidu sira foin primeíra mai hatan iha tribunál nomós hanesan tempu baibain arguidu sira mak nu'udar xefi ba família hodi sustenta vida família nian.

Prosesu julgamentu ho lee leitura akórdaun sei halo iha lora 3 Jullu 2012, iha oras tuku 14.30 lorokraik.

6. Kazu krime violénsia doméstika Nú.45/PEN/2012/TDS

Iha lora 22 fulan Juñu 2012, Tribunál Distritál Suai halo julgamentu ba kazu krime violénsia doméstika ne'ebé rejista ho Númeru Prosesu: 45/PEN/2012/TDS. Arguidu ba kazu ne'e ho inisiál GRH hasoru vítima SdC. Kazu akontese iha Suco Fatu-Udo Distritu Ainaro, iha lora 27 Novembru 2011.

Prosesu julgamentu ba kazu ne'e, dirije husi juíz singulár Dr. Pedro Rapoza Figueireiro (Juíz internasionál), Ministériu Públiku reprezenta husi Dr. António da Silva Tavares no arguidu hetan defeza husi Dr. Marçal Mascarenhas husi Eskritóriu Defensória Públiku.

Bázeia ba akuzasaun Ministériu Públiku nian, katak iha lora 27 Novembru 2011, iha oras tuku 19.00 kalan, arguidu halo aktu krime hasoru nia konjúje. Kazu ne'e realijadu ho maneira; basa dala 2 (rua) iha vítima nia hasan karuk no tuku tan ba vítima nia isin loloon.

Rezultadu husi arguidu nia hahalok halo vítima hetan bubu iha parte hasan. Motivu ba kazu ne'e, tanbá arguidu nia asu 2 (rua) lakon no husu ba vítima maibé vítima dehan nia lahatene hodi nune'é arguidu nervoju halo aksaun ne'e.

Relasiona ho akontesementu ne'e, Ministériu Públiku akuza arguidu ho artigu 2.1 alinea (a), artigu 3 alinea (b), artigu 35 no 36 Lei No.07/2010 konjugadu ho artigu 145.1 Kódigu Penál.

Iha prosesu julgamentu ba kazu ne'e, arguidu hili nia direitu nonook tuir artigu 60 alinea (c) husi Kódigu Prosesu Penál.

Mesmu nune'é, iha vítima nia deklarasaun ba tribunál kontinua reforsa faktu no kronolojia ne'ebé hakerek iha akuzasaun laran. Mesmu nune'e, vítima depoimeta liu tan katak depoisde akontesementu liu tiha lora 2 arguidu ho vítima diak fali malu no moris hanesan feen ho laen. Ne'e akontese tanbá arguidu husu deskulpa no vítima fó perdaun ba arguidu.

Tuir mai, testamuña ho inisiál SG depoimentu ba tribunál katak akontesementu ba kazu ne'e, testamuña rasik haree ho matan katak arguidu basa dala 2 (rua) kona iha vítima nia hasan karuk no tuku tan iha vítima nia isin loloon. Aliende ne'e, testamuña haktuir liu tan katak depoisde akontesementu liu tiha lora 3 (tolu), testamuña haree arguidu ho vítima komesa diak fali malu no moris hanesan baibain.

Mesmu nune'é, Iha alegasaun finál Ministériu Públiku nian, husu ba tribunál atu kondena arguidu ho pena prizaun tinan 2, maibé suspende ba tinan 3. Pozisaun Ministériu Públiku bázeia ba deklarasaun husi vítima ho testamuña no liga akuzasaun Ministériu Públiku nian.

Entertantu parte defeza husu ba tribunál atu aplika pena suspensaun ba arguidu, ho razaun tanbá arguidu foin primeíra ves halo krime no arguidu, arepende ba nia hahalok no iha tempu hanesan baibain arguidu mak nu'udar xefi ba família hodi sustenta vida moris família nian.

Prosesu julgamentu ho lee leitura sentensa sei halo iha loron 28 Juñu 2012, iha oras 10.00 dader.

7. Kazu krime ofensa integridade física simples Nú. 58/PEN/2012/TDS

Iha loron 22 fulan Juñu 2012, Tribunál Distritál Suai hala'ó julgamentu ba kazu ofensa integridade física simples ne'ebé rejista ho Número Prosesu: 58/PEN/2012/TDS. Arguidu ba kazu ne'e ho inisiál DA hasoru vítima BdR ne'ebé akontese iha Suco Holpilat Sub-distritu Maukatar Distritu Covalima, ne'ebé akontese iha loron 7 fulan Feveiru 2012.

Prosesu julgamentu dirije ho tribunal singulár ne'ebé representa husi Dr. Pedro Rapoza Figueiro, Ministériu Públiku representa husi Dr. António da Silva Tavares no arguidu hetan defeza husi Dr. João Henrique de Carvalho husi Eskritóriu Defensória Públiku.

Audiénsia julgamentu hahú ho lee akuzsaun mai husi Ministériu Públiku nian. Haktuir iha akuzasaun katak iha loron 7 Feveiru 2012, arguidu halo aktu krime hasoru vítima. Kazu ne'e realijadu ho maneira arguidu tuku dala ida kona iha vítima nia matan fukun parte karuk dala ida no lori katana nia kotuk taa iha vítima nia liman dala 3 (tolu). Konsekuensia husi arguidu nia hahalok ne'e, vítima hetan kanek iha matan fukun no matan sai bubu metan.

Relasiona ho akontesementu ne'e, Ministériu Públiku akuza arguidu ho artigu 145.1 Kódigu Penál ho moldura penál to'o tinan 3 ka multa.

Ba tribunál arguidu rekuñese katak akuzsaun Ministériu Públiku nian loos hotu. Maibé, arguidu mós depoimentu ba tribunál katak arguidu arependimentu ba nia hahalok ne'ebé halo hasoru vítima no promote katak sei la repete tan hahalok ne'e iha futuru no ba sé deit.

Iha vítima nia deklarasaun ba tribunál kontinua reforsa faktu ne'ebé hakerek iha akuzasaun laran.

Tuir mai, testamuña ho inisiál FRA depoimentu ba tribunál katak akontesementu ba kazu ne'e, testamuña rasik haree ho matan katak arguidu tuku dala ida kona vítima nia matan fukun parte karuk no lori katana nia kotuk taa dala 3 kona iha vítima nia liman los.

Relasiona ho prosesu no faktu ne'ebé produz iha audiénsia julgamentu laran, iha alegasaun finál Ministériu Públiku nian, husu ba tribunál atu kondena arguidu ho pena prizaun tinan 1 fulan 6, maibé suspende ba tinan 2. Aleinde ne'e kondena mós arguidu atu selu indemnizasaun ho valór US\$.200.00 (atus rua) dolares amerikano.

Entertantu, parte defeza husu ba tribunál atu aplika pena suspensaun fulan 3 (tolu) ba arguidu ho razaun arguidu foin primeíra ves mai hatan iha tribunál no arguidu arepende nia hahalok hirak ne'e.

Prosesu julgamentu ho lee leitura sentensa sei halo iha lora 28 Juñu 2012, iha oras 11.00 dader.

8. Kazu krime violénsia doméstika Nú.61/PEN/2012/TDS

Iha lora 22 fulan Juñu 2012, Tribunál Distritál Suai hala'ó julgamentu ba kazu violénsia doméstika ne'ebé rejista ho Númeru Prosesu: 61/PEN/2012/TDS. Arguidu ba kazu ne'e ho inisiál DS hasoru vítima AB ne'ebé akontese iha Suco Leo Hitu Sub distritu Balibo Distritu Bobonaro, iha lora 25 fulan Juñu 2011.

Prosesu julgamentu dirije husi Juíz Dr. Pedro Rapoza Figuerreiro (Juíz internacional), Ministériu Públiku reprezenta husi Dr. António da Silva Tavares no arguidu hetan defeza husi Dr. Marçal Mascarenhas husi Eskritóriu Defensória Públiku.

Bázeia ba akuzasaun Ministériu Públiku nian, katak iha lora 25 Juñu 2011, iha tuku 08.00 dader, arguidu halo aktu krime hasoru nia konjúje. Kazu ne'e realijadu ho maneira mak hanesan arguidu lori telefone tuda vítima no tuku ba iha vítima nia isin loloon. Motivu ba kauza ne'e, tanbá arguidu bandu vítima atu lalika ba bazar iha Balibo maibe vítima kontinua hakarak atu ba bazar. Tanba ne'e, arguidu nervoju hodi halo aktu krime hasoru vítima hanesan haktuir iha akuzasaun laran.

Relasiona ho akontesementu ne'e, Ministériu Públiku akuza arguidu ho artigu 35 Lei No.07/2010 Lei Kontra Violénsia Doméstika konjugadu ho artigu 145.1 Kódigu Penál.

Iha deklarasaun arguidu nian, katak akuzasaun Ministériu Públiku loos hotu. Maibé arguidu mós depoimentu liu tan katak depoisde akontesementu arguidu ho vítima diak fali malu ona no moris hanesan baibain. Liu tan arguidu deklara ba tribunál katak nia arependimentu ba nia hahalok hirak ne'e.

Mesmu nune'é, iha vítima nia deklarasaun kontinua reforsa faktu ne'ebé hakerek iha akuzasaun laran, vítima mos rekoñese katak depoisde akontesementu vítima fó perdua ba arguidu tanbá arguidu husu fali deskulpa.

Bázeia ba prosesu no faktu hirak ne'e, iha alegasaun finál Ministériu Públiku nian, husu ba tribunál atu kondena arguidu ho pena prizaun tinan 1 fulan 6, maibé suspende ba tinan 2.

Entertantu parte defeza husu ba tribunál atu aplika pena suspensaun ba arguidu ho razaun arguidu rekuñese no arependimentu ba nia hahalok nomós iha tempu hanesan baibain arguidu nu'uda xefi ba família hodi sustenta vida familia.

Prosesu lee leitura senrensa sei halo iha lora 28 Juñu 2012, iha oras tuku 11.30 dader.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883